

इवनिंग डोगरी न्यूज़ बुलेटिन

समे .18:15 Hrs

एह आकाशवाणी जम्मू ऐ, संजा खबरें च तुंदा सुआगत, पैहलें खास-खास खबरें कन्नै में जगमोहन शर्मा।

<><><><><><>

Headlines

1. प्रधानमंत्री नरेंद्र मोदी होरें अज्ज खेलो इंडिया संवाद दरान जम्मू-कश्मीर दी पैरा तीरंदाज शीतल देवी दी सिफ्त कीता।
2. केंद्री मंत्री डा. जितेंद्र सिंह होरें आखेआ ऐ कि प्रधानमंत्री मोदी होरें नौजवानें दी सोच गी सरकारी नौकरिएं थमां उद्यमता बक्खी मुंतकिल कीता ऐ।
3. जम्मू-कश्मीर ते लद्दाख थमां फिक्की एफ.एल.ओ ते अक्षयपात्र फाउंडेशन दे शिष्टमंडल अज्ज श्रीनगर च मुखमंत्री होरें गी मिले।
4. कश्मीर घाटी च इक्कले सक्रिय आतंकी दे सिरै पर 15 लक्ख दा ईनाम घोशित, ओहदी मजूदी बारै जुलाई म्हीने तगर कोई जानकारी नेई ही।
5. ते किश्तवाड़ च इक नाबालिग बच्ची कन्नै दुष्कर्म ते मौत दे मामले च 3 होर आरोपी गिरफ्तार।

<><><><><><>

ते हुन खबरें दी तफसील कन्नै श्रुति खजूरिया।

<><><><><><>

PM-Sheetal

प्रधानमंत्री नरेंद्र मोदी होरें जम्मू-कश्मीर दी शान पैदा तीरंदाज शीतल देवी दी खेलो इंडिया डायलाग गी वर्चुअल माध्यम राएं संबोधित करने दरान सिफत कीती। एह संबोधन राष्ट्री खेड्ढ दिवस दे सरबंध्य च हा। प्रधानमंत्री होरें आखेआ जे शीतल देवी इक मुख मिसाल ऐ जे कियों खेड्ढां जिंदगी च बड्डा बदलाव आहिंदियां न ते असिमित संभावनाएं गी दर्शादियां न। उनें शीतल दे अजे तगर दी जातरा गी चेता कीता ते दस्सेआ जे शीतल दी सफलता नै जम्मू-कश्मीर गै नेई सगुआं पूरे मुख्य गी मानै नै भरी दिता। उनें आखेआ .

<><><><><><>

Jitender Youth Mindset

केंद्री मंत्री डा. जितेंद्र सिंह होरें आखेआ जे प्रधानमंत्री नरेंद्र मोदी देसै दे नौजवानें दी सोच च बड़ा व्यापक ते महत्वपूर्ण बदलाव आंदा ऐ ते अज्ज दा नौजवान नौकरिएं पिच्छे खज्जल होने दे बजाय आपूं अपना कम्म करने, स्वरोजगार अपनाने ते नमियां काहडां कड्डने च यकीन रखदे न। जितेंद्र सिंह होरें आखेआ जे एह बदलाव मुख्यै च नमै-नमै स्टार्ट अप्स दी उप्परोतली गिनतरी थमां साफ नजरी आँदा ऐ ते किस चाल्ली नौजवानें अंदर उद्यमता गी लेइयै दिलचस्पी बधी ऐ ते अपनी काबलियत दे बूते पर स्हाड़ा नौजवान अपनियां आसां-ताहंगां पूरियां करदे होई राष्ट्र निर्माण च अपना योगदान देआ करदे न। उनें आखेआ कि सरकार दा ध्यान बी नौजवानें गी रोजगार तुप्पने आहलें दे बजाय रोजगार देने आहलें दे रूपै च तैयार करने पर ऐ। उनें आखेआ कि 2014 च मुख्यै च मसां कोई साड्डे त्रै सो गै स्टार्ट अप हे जिसलै जे अज्ज एह गिनतरी 2 लक्ख 30

जहार कोला मती ऐ। आई.आई.एम जम्मू च आयोजित खेलो इंडिया संवाद दे बाहरें पत्रकारें कन्नै गल्ल करदे होइ डा. जितेंद्र सिंह होरें आखेआ ..

<><><><><><>

CM-Delegation

FICCI FLO जम्मू-कश्मीर ते लद्दाख ते अक्षय पात्रा फाउंडेशन दे प्रतिनिधिमंडल नै मुख मंत्री उमर अब्दुल्ला हुंदे कन्नै सिविल सचिवालय श्रीनगर च मलाटी कीती। इसदी अगुवाई चेयरपर्सन वर्षा बंसल होर करारदियां हियां। जेएण्डके चैंप्टर नियमित समें पर क्षेत्रीय नेताएं कन्नै मलाटी करदा ऐ तां जे सियासी हुनर विकास, सिखलाई तें आर्थिक गतिविधिएं गी महिलाएं आस्तै जम्मू-कश्मीर ते लद्दाख च मौके पैदा होई सकन। अक्षय पात्रा फाउंडेशन दे प्रतिनिधिमंडल नै बी मुखमंत्री हुंदे कन्नै मलाटी कीती। इस प्रतिनिधिमंडल दी अगुवाई सीईओ श्रीधर होर करारदे न। प्रतिनिधिमंडल नै केई सारे समाज कल्याण ते शिक्षा सरबन्धी जत्नें पर चर्चा कीती।

<><><><><><>

Terror Associates Arrested

कुलगाम जिले दे बुगाम इलाके च सुरक्षाबलें आस्सेआ सांझे तौर पर चलाए गेदे अभियान दौरान असला- बरुद बरामद कीता गेआ ते इस सरबन्धै च 5 लोकें गी गिरफ्तार कीता गेआ। एह अभियान सांझे तौर पर भारतीय सेना- जम्मू कश्मीर पुलिस ते CRPF आस्सेआ चलाया गेआ। इलाके दी घेराबंदी करिए चलाए गेदे सुरक्षाबलें 4 9 एम.एम. पिस्तौला- 4 मैगजिनां- 2 हथगोले ते होर दुआ असला बरुद बरामद कीता ऐ। इस सरबन्धै च फगड़े गेदे लोकें गी पुलिस दे हवाले करी दिता गेआ ऐ ते अगड़ी जांच कीती जा'रदी ऐ।

<><><><><><>

Heroin Cartel Busted

नशीले पदार्थे दी रोकथाम सरबन्धी ब्यूरो दा आखना ऐ जे बन्ने पारा थमां होने आहले नशीले पदार्थे दी तस्करी आहले मामले च बड्डी कारवाई तैहत 5 इशारिया 1-6 किलोग्राम नशीले पदार्थे जब्त कीते गे न। इस सरबन्धे च त्रै लोकें गी गिरफ्तार बी कीता गेआ ऐ। इंदे चा इक मुख साजिशकर्ता बी दस्सेआ जा'रदा ऐ। शनिवारे इक टकोदी सूह पर कारवाई करदे होई पंजतीर्थी इलाके च इक गड्डी गी फगड़ेआ। इस सरबन्धे च 2 लोकें गी बी फगड़ेआ गेआ ऐ। एह नशीले पदार्थे करोड़ें रपे दे दस्से जा'रदे न। फगड़े गेदे दवै लोक उत्तरी कश्मीर दे बारामुला जिले कन्नै सरबन्ध रक्खदे न। एदा मुख साजिशकर्ता जेड़ा जे बारामुला दा गै बसनीक ऐ ते नशीले पदार्थे दी तस्करी करदा ऐ गी सोमवारें लद्दाख थमां गिरफ्तार कीता गेआ हा।

<><><><><><>

ते हुन बाकि दिएं खबरें कन्नै जगमोहन शर्मा।

Terrorist Reward

जम्मू-कश्मीर पुलसै 22एं बरें दे आतंकवादी मोहम्मद लतीफ भट्ट दे सिरै पर 15 लक्ख रुपें दा ईनाम रक्खेआ ऐ ते दक्खनी कश्मीर ते श्रीनगर च केई प्रमुख थाहें पर ओहदे इश्तेयार लाई दिते गेदे न। पुलसै दे रिकार्ड मूजब लतीफ भट्ट एल्लै कश्मीर घाटी च इक्कला जींदा ते सक्रिय आतंकवादी ऐ जेहदे बारै जुलाई म्हीने तगर कुसै गी पता गै नेई हा ते इत्थू तगर गै सुरक्षाबलें दी जानकारी कन्नै जुड़े दे 20 कोला 30 आतंकवादी जिंदे चा ज्यादातर पाकिस्तानी न, घने जांगली इलाकें च छप्पे दे न। पुलसै दा आखना ऐ जे इस आतंकवादी बारै कोई बी सूह देने आहलें गी 15 लक्ख रुपें दा ईनाम दिता जाहग ते ओहदी जानकारी गुप्त रक्खी जाहग।

<><><><><><>

Chatroo Casse-Three Arrests

किश्तवाड़ जिले च 14एं बरें दी इक बच्ची कन्नै दुष्कर्म ते ओहदी मौत दे मामले च जम्मू-कश्मीर पुलसै 3 होर आरोपिं गी गिरफ्तार करी लैता ऐ। अजें धोड़ी इस मामले च 5 आरोपी गिरफ्तार होए दे न। उस बच्ची दी मौत दे बाद पुलसै मुख आरोपी खालिद हुसैन शेख जेहड़ा इक स्कूल हैडमास्टर हा ते ओहदे ब्राह तारिक हुसैन गी गिरफ्तार कीता हा। इनें गी बी.एन.एस ते पाक्सो कन्नू तैहत हिरासतै च लैता गेआ हा। इस बारै जानकारी सांझी करदे होई एसएसपी किश्तवाड़ नरेश सिंह होरें दस्सेआ जे 20 अगस्त गी छात्र पुलस थाने च इक नाबालग कुड़ी दी संदिग्ध हालात च मौत दी खबर हासल होई ही। अजें कि शुरू च कोई औपचारिक शकैत इस मामले च दर्जे नेई ही कराई गेई पर मगरा बाद च इस बारै पुच्छ-पड़ताल दे बाद एह मामला सामने आया हा।

<><><><><><>

Raksha Bandhan Udh.

रक्खड़ी दे ध्यार कोला इक रोज पैहले अज्ज उधमपुर दे इक प्राइवेट स्कूल दिं बच्चिं सी.आर.पी.एफ दी 187 बटालियन दे कैप च अधिकारिं ते जवानें गी रक्खड़ी बन्नियै उंदे प्रति आम नागरिकें दे हिर्ख सम्मान गी प्रगट कीता। इस मौके कमांडेंट मनीश कुमार यादव होरें बच्चें कन्नै गल्लबात कीती ते उंदा आभार प्रगट कीता। इस मौके बच्चिं अपने बचार प्रगट करदे होई आखेआ .

मगरा मीडिया कन्नै गल्ल करदे होई कमांडेंट मनीश कुमार यादव होरें आखेआ .

<><><><><><>

Raksha-Bandhan Kathua

बनी ते डुग्गन थमां एकल अभियान आचार्य कठुआ दे डुग्ग ब्लाक च पुज्जे ते रक्षा बंधन दा त्यौहार भारती सेना दे जोआनें कन्नै मनाया। इनें सेना दे जोआनें दी वीणी पर रक्खड़ी बन्नी। इस जत्न दा मकसद सैनिके कन्नै अपनी हमदर्दी ते सद्भाव दी भावना गी बदाना ते भारती सेना ते समाज बश्कार भाईचारे दी भावना गी बल देना हा। इस मौके पर बोलदे होई इक महिला प्रतिभागी नै आखेआ .

<><><><><><>

Prog. Announcement

राष्ट्री खेड्ढ दिवस दे मौके पर आकाशवाणी दा क्षेत्रीय समाचार एकांश जम्मू इक विशेष चर्चा प्रसारित करने जा'रदा ऐ। शनिवारें 29 अगस्त गी दपैहरी ढाई बजे प्रसारित होने आहले 30एं मिंटे दे इस कार्यक्रम दा विशे रौहग अगड़े बधदी भारत दी खेड्ढ जातरा। इस कार्यक्रम च स्हाड़े परौहने होडन मन्ने-परमन्ने दे पत्रकार ते यू.एन.आई जम्मू दे ब्यूरो चीफ विशाल भारती जेहड़े इस विशे पर अपने बचार ते तजुर्बे सांझे करडन। कार्यक्रम दी मेजबानी करडन स्हाड़े न्यूज एंकर विजय बजाज .

<><><><><><>